

Ni Presidente
Thomas S. Monson



“Nagungaren”

PAMMANEKNEK TI MAYSA A PROPETA

“**T**i nalawag a mensahe ti Sangakristianoan,” impakdaar ni Presidente Thomas S. Monson, ket ti panagungar ni Jesus a taga Nazaret manipud kadagiti natay. “Ti kinapudno ti Panagungar ket mangted iti maysa ken amin iti talna a mangdaeg iti pannakaawat” (kitaen iti Taga Filipos 4:7).¹

Kadagiti sumaganad a binatog, imburay ni Presidente Monson ti pammaneknekna ken ti panagyamanna iti Panagungar ti Mangisalakana ken ipakdaarna a gapu ta ti Anak ket pinarmekna ti patay, amin nga annak ti Ama nga umay iti daga ket agbiagto manen.

Biag iti labes ti Mortalidad

“Mamatiak nga awan kadatayo ti makailadawan iti naan-anay a kaipapanan ti no ania ti inaramid ni Cristo para kadatayo iti Getsemani, ngem agyamanak iti inal-daw ti biagko para iti pangsubbot a sakripisiona para kadatayo.

“Iti maudi a kanito, mabalinna koma ti nagsanud. Ngem dina inaramid. Napasaranna ti kakaruan amin a banag tapno maispalna ti amin a banag. Iti panangaramidna iti daytoy, Isu ket nangted kadatayo iti biag iti labes daytoy a mortal a biag. Inispalnatayo manipud iti Pannakatnag ni Adan.

“Iti kaunggan ti kararuak, agyamanak Kenkuana.

Sinuruannatayo no kasano ti agbiag. Sinuruannatayo no kasano ti matay. Impatalgedna ti pannakaisalakantayo.”²

Panangiwaksi iti Kinasipngget ti Ipatatay

“Kadagiti masinunuo a kasasaad, kas iti nakaro a panagsagaba ken sakit, umay ti ipapatay a kas maysa nga anghel ti kaasi. Ngem iti kaaduan a paset, ipapan-tayo daytoy a kas kabusor ti kinaragsak ti tao.

“Ti kinasipngget ti ipapatay ket mabalina a maiwaksi babaen ti silaw ti naipalgak a kinapudno. ‘Siak ti panagungar, ken ti biag,’ kinuna ti Maestro. ‘Ti mamati kaniak, uray no matay, agbiagto pay: Ket siasino man nga agbiag ken mamati kaniak, saanto a matay iti kaano man.’

“Daytoy a naipanamnana—wen, uray ti nasantuan a pammatalged—ti biag iti labes ti tanem ket makaipaay a naimbag iti talna nga inkari ti Mangisalakana idi impanamnana kadagiti disipulona: ‘Ti talna ibatik kadakayo, ti talnak itdek kadakayo: saan a kas iti panangited ti lubong ti panangitedko kadakayo. Saan koma nga agpulkok ti pusoyo, ken di agbuteng.’”³

“Awan Ditoy”

“Nagbiag manen ti Mangisalakantayo. Ti kadayagan, makaliwliwa, ken makapanamnana iti amin a pasamak

iti pakasaritaan ti tao ket napasamaken—ti balligi iti ipapatay. Napunasen ti sakit ken saem iti Getsemani ken Kalbario. Napatalgedanen ti pannakaisalakan ti sangkawat-an. Naispalen ti Pannakatnag ni Adan.

“Ti awan nagyanna a tanem iti dayta umuna a Paskua ti Panagungar ti sungbat iti saludsod ni Job, ‘No matay ti tao, agbiagto aya manen?’ Kadagiti amin a tao a makangngeg iti timekko, ipakdaarko, No matay ti tao, agbiagto manen. Ammotayo, gapu ta addaantayo iti silaw ti naipalgak a kinapudno. . . .

“Patpatgek a kakabsatko, iti oras ti kinalidaytayo, makaawattayo iti naindaklan a talna manipud kadagiti balikas ti anghel iti dayta umuna nga agsapa ti Paskua ti Panagungar: ‘Awan ditoy: gapu ta nagungaren.’”⁴

Agbiagto Manen ti Amin a Tao

“Agkatawatayo, agsangittayo, agrabahotayo, agay-ayamtayo, agayattayo, agbiagtayo. Ket kalpasanna mataytayo. . . .

“Ket agtalinaedtayo koma a matay no saan a gapu iti maysa a Tao ken ti misionna, ni Jesus ti Nasaret. . . .

“Iti amin a pusok ken nasneban a kararuak, itagayko ti timekko iti pammaneknek kas maysa a naisangsangayan a saksi ket ipakdaarko a sibibiag ti Dios. Ni Jesus ti Anakna, ti Bugbugtong ti Ama iti lasag. Isu ti Mannubbottayo; Isu ti Mangibabaettayo iti Ama. Isu ti natay iti krus tapno subbotennatayo gapu kadagiti basoltayo. Isu ti nagbalin nga umuna a bunga ti Panagungar. Gapu ta natay, amin a tao ket agbiagto manen.”⁵

Maysa a Bukod a Pammaneknek

“Ipakdaarko ti bukodko a pammaneknek a naparmeken ti ipapatay, nagun-oden ti balligi iti tanem. Agbalin koma a pudno a pannakaammo iti amin dagiti balikas nga inaramidna a sagrado Isu a nangipatungpal kadagito. Laglagipenyo dagitoy. Ipategyo dagitoy. Dayawenyo dagitoy. *Nagungaren!*”⁶

DAGITI NAGADAWAN

1. “He Is Risen,” *Liahona*, Abr. 2003, 7.
2. “At Parting,” *Liahona*, Mayo 2011, 114.
3. “Now Is the Time,” *Liahona*, Ene. 2002, 68; kitaen met iti Juan 11:25–26; 14:27.
4. “He Is Risen,” *Liahona*, Mayo 2010, 89, 90; kitaen met iti Job 14:14; Mateo 28:6.
5. “Ammok a Sibibiag ti Mannubbotko!” *Liahona*, Mayo 2007, 24, 25.
6. *Liahona*, Mayo 2003, 7.

PANANGISURO MANIPUD ITI DAYTOY A MENSAHE

Kalpasan iti panangiburay kadagiti adaw manipud iti mensahe ni Presidente Monson, panunoten ti pammaneknek nga iburayna maipapan iti pudno a kaipapanan ti Paskua ti Panagungar. Mabalinyo a saludsoden kadagiti miembro ti familia dagiti sumaganad a saludsod: “Ania ti kaipapananna kadakayo a ti maysa a sibibiag a propeta ket nagpaneknek kadagitoy a kinapudno ita nga agdama? Kasano a mayaplikaryo dagitoy iti biagyo?” Ibilangyo ti pananginayonyo iti pammaneknekyo.

AGTUTUBO

Makitakto Manen Isuna

Ni Morgan Webecke

Imparikna ti amak a tunggal maysa kadakami nga anak ket naisangsangayan. Impategnakami ken nadaras a mamakawan. Inaramidna ti amin a kabaelanna tapno masinunuona a tunggal maysa kadakami ket naragsak, ken inlawlawagna a kayatna ti kasayaatan para kadakami. Impategko unay isuna.

Idi addaak iti maikanem a grado, natay ti amak iti maysa nga aksidente iti lugan. Napalalo unay ti ladingitko ken ti pamiliak. Adda dakkal a giwang iti pamiliami. Ti amak ti tao a nagsadagak, ti maysa a tao nga inasitgak no adda idi dagiti problemak. Imbes nga agsapulak iti tulong kalpasan ti ipapatayna, binay-ak ketdi nga agtalinaed ti pungtot ken sakit. Inkeddengko iti kamaudiananna a basol ti Dios daytoy. Insardengko ti agbasa kadagiti nasantuan a kasuratak ken agkararag. Napanak laeng iti simbaan gapu ta kayat ni Nangang a mapanak. Pinadasko ti umadayo iti Nailangitan nga Amak.

Kalpasanna napanak iti Young Women camp iti umuna a gundaway. Kinayatko ti makiam-ammo kadagiti baro a gagayem, ngem diak pay laeng nagbasa kadagiti nasantuan a kasuratak. Iti maudi a rabii, naaddaankami iti miting ti panagpaneknek. Nariknak ti maysa a banag nga awan kaniak iti nabayagen a panawen: ti Espiritu. Dinayawko dagiti babbalasitang a timmakder ken nangiburay kadagiti pammaneknekda, ngem nagtalinaedak a nakatugaw gapu ta impagarupko nga awan pammaneknekko. Kellaat

a nariknak a masapul a tumakderak. Inungapko ti ngiwatko, a masmasdaawan no ania ti sawek. Isu nga insaok a naragsakak para iti Young Women camp. Kalpasanna natakataak ti bagik nga agsasao nga ammok a natay ni Jesucristo para kaniak ken ay-ayatennak ti

Nailangitan nga Amak ken pudno ti Simbaan.

Napnuanak iti naisangsangayan a talna. Agyamanak iti daytoy a padas a masaok nga ammok a makitakto manen ti amak gapu iti Pannubbot ken Panagungar ti Mangisalakan.



Pammati, Pamilia, Tulong

Ayaten, Bantayan, ken Papigsaen

Sikakararag nga adalenyoy daytoy a material ken, no maitutop, paglilinnawaganyoy daytoy kadagiti kakabsat a babbai a sarungkaranyoy. Usarenyo dagiti saludsod a mangtulong kadakayo a mangpapigsa kadagiti kakabsatyo a babbai ken mangaramid iti Relief Society nga aktibo a paset iti bukodyo a biag.

Kas iti Mangisalakan, agserbi dagiti visiting teacher a saggaysa (kitaen iti 3 Nephi 11:15). Ammotayo nga agballigitayo iti panagserbitayo a kas visiting teacher no maisao dagiti kakabsattayo a babbai ti: (1) tululongannak ti visiting teacherko a dumur-as a naespirituan; (2) ammok a ti visiting teacherko ket ipatpatengnak ken ti familiak; ken (3) no adda dagiti problemak, ammok nga agtignayto ti visiting teacherko a saanna nga urayen a makiddaw.¹

Kasano a maayat, mabantayan, ken mapapigsatayo kas visiting teacher ti maysa a kabsat a babai? Sumaganad dagiti siam a singasing a masarakan iti kapitulo 7 iti *Daughters in My Kingdom: The History and Work of Relief Society* tumulong kadagiti visiting sister nga agserbi kadagiti kakabsatda a babbai:

- Agkararag iti inaldaw para kenkuana ken ti pamiliana.
- Agkalikagum a maaddaan iti pammaregta a mangam-ammo kenkuana ken ti pamiliana.
- Kanayon a sumarungkar kenkuana a mangkumusta ken mangliwiwa ken mangpapigsa kenkuana.
- Pagtalinaeden ti masansan a panakikontak babaen ti isasarungkar, itatawag iti telepono, surat, e-mail, text message, ken simple nga aramid ti kinaimbag.

- Kumablaaw kenkuana kadagiti miting ti Simbaan.
- Mangtulong kenkuana no adda pettat a panagkasapulan, sakit, wenno dadduma pay a madagdagus a panagkasapulanna.
- Isuro kenkuana ti ebanghelio manipud kadagiti nasantuan a kasuratan ken dagiti Mensahe iti Visiting Teaching.
- Mangparegta kenkuana babaen iti panangipakita iti nasayaat a pagwadan.
- Ireport iti lider ti Relief Society maipapan iti panagserbida ken ti naespirituan ken temporal a pagsayaatan ti kabsat a babai.

Manipud iti Pakasaritaantayo

“Ti visiting teaching ket nagbalinen a wagas para kadagiti babbai a Santa iti Ud-udina nga Aldaw iti sangalubongan tapno agayat, agtaripato, ken agserbi—tapno ‘agtignay a mayannurot kadagiti pannakipagrikna nga immulan ti Dios iti barukong[tayo]’, kas insuro ni Joseph Smith.”²

Kinuna ti maysa a kabsat a babai a nabalo itay nabiiit maipapan kadagiti visiting teacher: “Dimnggeda. Liniwliwadak. Nakipagladingitda kaniak. Ken inarakupdak. . . . Tinulongan[dak] a makalung-aw iti napalalo a pannakapaay ken panagladingit kadagiti immuna a sumagma-mano a bulan ti panagmaymaysak.”³

Ti itutulong maipapan kadagiti aramid a temporal ket maysa pay a wagas ti panagserbi. Iti sapisap a komperensia idi Oktubre 1856, impakaammo ni Presidente Brigham Young a dagiti nagkauna a kameng nga aggyuyod iti karison [handcart pioneer] ket simmadsadda iti nauneg a niebe a 270–370 a milia (435–595 kilometro) ti kaadayona. Inawaganna dagiti Santo iti Ud-udina nga Aldaw iti Salt Lake City tapno tumulongda kadakuada ken “mangipaay a naan-anay kadakuada kadagiti banag nga aw-awagantayo iti temporal.”⁴

Inrekord ni Lucy Meserve Smith nga inuksob dagiti babbai dagiti napudot nga akin-uneg a paldada ken medias iti mismo a tabernakulo ket impempenda dagitoy kada-giti bagon tapno ipatulod kadagiti malamlammin unay a nagkauna a kameng [pioneer]. Kalpasanna nagurnongda kadagiti ules ken lupot para kadagiti sumangpet a bassit laeng ti aruatenda. Idi makasangpet dagiti bunggoy nga aggyuyod iti karison, “napno kadagiti abasto para kadakuada” ti maysa a pasdek iti ili.⁵

DAGITI NAGADAWAN

1. Kitaen iti Julie B. Beck, “What I Hope My Granddaughters (and Grandsons) Will Understand about Relief Society,” *Liahona*, Nob. 2011, 113.
2. *Daughters in My Kingdom: The History and Work of Relief Society* (2011), 112.
3. *Daughters in My Kingdom*, 119–20.
4. Brigham Young, “Remarks,” *Deseret News*, Okt. 15, 1856, 252.
5. Kitaen iti *Daughters in My Kingdom*, 36–37.

Manipud kadagiti Nasantuan a Kasuratan

Lucas 10:38–39; 3 Nephi 11:23–26; 27:21

Ania ti Maaramidko?

1. Kasano a maammuak no ania ti kasapulan dagiti kakabsatko a babbai?

2. Kasano a maammunto dagiti kakabsatko a babbai nga ipatpattegko unay ida?

Para iti ad-adu pay nga impormasion, mapan iti reliefsociety.lds.org.